

SPORT

Bob Club Beiva: restauraziun d'en bob vigl

Anc dei betg en «oldie»



Anc dattigl blera lavour anfignen tgi igl bob è pront. Tiers tgi chel model totga tar la categoria digls «oldies» cozza igl viadi aint igl vial da Son Murezza a Celerina angal 80 secundas. Cun en bob nov èn chegl angal 62 secundas.

● **G.N.S. Igl Bob Club Beiva dattigl ossa dus onns ed igl club è detg activ. Dasperas las occurrenz per igls commembers è igl club er schiglio activ ed actualmaintg ins è vedlonder da restaurar quatter bobs vigls da passa 70 onns.**

Dasper igls curlists èn igls bobists chels tgi gudognan savens medaglias tar igls campiunadis mundials u tar l'olimpiada. An nosa regiun è igl interess pigl sport da bob s'augmento cura tgi Giancarlo Torriani da Beiva è nia igl 1977 campium svizzer cuagl bob a quatter. En ulteriour tgatsch agl sport da bob ègl do an Surmeir igl 1987 cura tgi Celest Poltera è nia cuagl sies partenari Ralph Pichler campium mundial cuagl bob a dus a Son Murezza. Giancarlo Torriani ò alloura gia success scu parsoura dalla Federaziun svizra da bob e pi tard scu trener dalla «squadra azzura» da bob. Ossa siva da dus onn è el vicepresidente digl Bob Club Beiva. Fundo è chel nia avant dus onns ed actualmaintg ò igl club 160 commembers.

Siva digl 1890

L'istorgia digl bob vo anavos anfignen igl 1890. Tiers tgi a Tavo ò igl bob gia igl sies battesim è igl ampren vial da bob nia costruia

igl 1903 per lung dalla veia da Son Murezza a Celerina. Igl 1897 è nia fundo igl Bob Club Son Murezza tgi è a madem mument sto igl ampren club da bob digl mond. Igl ampren campiumadi mundial da bob a quatter ò gia li igl 1930. Da lez taimp davigl en bobist cuagl nom Fritz Feierabend, igl qual ò sessour scretg istorgia da bob. Sies bab Carl Feierabend ò costruia en bob scu chegl tg'ins veva

anc mai via. Cun egn da chels ò alloura Fritz Feierabend durant 20 onns domino la concorrenza, sto diversas gedas campium mundial e fatg tschintg medaglias tar igls gis olimpics. Anc oz è igl nom «Feierabend» ena legenda tar igls ameis digl sport da bob.

Adegna alla tschertga da bobs

Giancarlo Torriani ò adegna gia interess chegl tgi pertotga la con-

strucziun d'en bob. Er igls sies collegas da suprastanza digl Club da bob Beiva vegian interess per chella tgossa ed uscheia ins seia adegna alla tschertga da bobs pi vigls. «An Nagiadegn vaia catto divers bobs vigls» dei Giancarlo Torriani. Magari dovrigl per restaurar egn la part davant dad en bob e la part davos da l'oter bob, ò menziuno igl hotelier da Beiva. Catto bobs sen igls onns vegl dantant er an Austria, dei Giancarlo Torriani.

Prezzi Albert II. da Monaco

Igl 2006 è nia fatg igl film «Schwere Jungs» e siva da lò ò igl Club da bob Beiva scumanzo cun la restauraziun digls bobs vigls. Igl luvratori sa catta a Frauenfeld ed igl mument ins è vedlonder da cuntschier, reparar e buglier la tocanaglia da quatter bobs vigls. Giancarlo Torriani, ò detg tgi plachevel seia er tgi igl Bivians mosan interess per chella lavour ed egn da chels è Leo Grisch. Alla fegn da november on igls bobs lour battesim agl vial «Isgl» ad Insbruck ed igls 2. da mars 2009 von igls bobs oragiu digl vial da Son Murezza tar igl de digls «oldies». Chel de cura tgi igl prezzi Albert II. da Monaco vign uffizialmaintg commemembr digl Club da bob Beiva.



Cun blera buna viglia vignan igls bobs restauras. (da san.) Leo Grisch, Fritz Burger e Giancarlo Torriani.